

# Liedjesavond 2025

27 September



Liedjesbukske  
2025-2026



## Vakjury:

Harry Peters (VZ)  
Ger Heyman  
Martin van Boekholdt  
Louise van den Brandt  
Julia Beurskens

## Joeksjury

Resy Lucassen-Wolters (VZ)  
Benthe Steeghs  
Arno Reiniers  
Patrick Janssen  
Tijmen de Voogd

**ViedentaKliniek** haet "de Giel"  
geadopteerd, dae jaarliks wuurt oetgereik  
aan de zengers van 't winnende leedje.



**VieDentaKliniek**



## Vastelaovesliedjes 'n Bliërickse traditie

*De traditie van Bliërickse liedjes geit truuk nao de jaore vieftig van veurige ieëw. Nummers as "Wae brink mich nao hoes toe?", "'t Benkske aan de Maas" en "Och wae haet mich", woorte nog neet op geluudsdragers gezatte. Vanaaf 1961 verschene de ierste Bliërickse liedjes op 'n grammofoonplaat. Dees ier waas toebedeild aan "Hadde weej maar wat" van Lei Hermans.*

*Door de jaore haer zien vuuel schrievers, componiste en artieste groeët gewaore beej de Wortelepin. Dao zien weej as vereniging gruuets op. Ouk vanaovend gaon weer 4 liedjes deil oet make van de rieke historie aan Bliërickse liedjes en zulle op 11 november verschiene op CD en Spotify. De winnaer van vanaovend krieg de wisseltrofee "de Giel" oetgereik. Deze wisseltrofee is 'n ierbetoeën aan de legendarische componist, zenger en Vors Giel Geurts en wuurt meugelik gemak door VieDenta Kliniek.*

*De finale wuurt vanaovend live oetgezónde via 'ne livestream zoeëdet ós geweldige liedjes ouk in de hoeskamers in Bliërick en vaer dao boete te hure en te zeen zien. Op veurhand wille weej alle vreejwilligers, artieste, schrievers, componiste, arrangeurs en alle partieë die zich de letste maonde hebbe ingezatte um deze Liedjesaovend meugelik te make hertelik danke!*

*Ónder 't motto "**Good Gemuts**" winse weej óg 'ne fantastische aovend heej in 't Raodhoes.*

**Bestuur en leje Vastelaovesgezelschap "de Wortelepin"**

## Sponsors van de Liedjesavond 2025



‘TRAODHOES GOOLJERAOD



# ***DYNAMIC***

— beeld, licht & geluid —

# we4media

marketing & communicatie

# Gewoeën negaere

Zang: Marina Claessen, Willy Billekens



## Couplet:

't Waer zit dökker taege, 't majjemp op vandaag hiel hard en dök,  
En dan nao dae raegen, houwt metein de hets dich van de zök,  
Is det 'ne zaege? Is det naatje pet?  
Want det nieje klimaat mak van alles paraat,  
En wie hendels se det?

## Refrein:

Gewoeën negaere, maak dich neet drök,  
Zing met mich mei vandaag, det bringk gelök.  
Gewoeën negaere, dae gansen driet,  
Al is det winne, de hoofs maar te beginne,  
Dan veuls se 't van binne, nao eine korten tied.  
Det is 't ketje, ik maak met dich ein wedje,  
De bis nao ein coupletje daen ozel kwiet.

## Couplet:

'k Heb ein alde tante, die ging lesse veur eur riebewies,  
Det stónd beej die kwante gans dao baovenaan eur bucketlies.  
Maar die beejdehante kreeg dao neet d'n drei  
"Wie mier lesse ik pak, jao, wie dökker ik zak,  
Zeg, wat mó't ik dao mei?"

## Couplet:

"Ik gaon minder aete", zag mien zuske: "Alles zit te strak!"  
Maar 't waas vergaete, det 't tössedoor die kilo's pak,  
Mood um zich te maete, zak um in de schoon,  
"Doon ik nog zoeë mien bes, ik waer noeëts mäötje S,  
Och wat mó't ik toch doen?"

# Hoempapa en blaosmeziek

Zang: Coen Janssen



## Couplet:

Dae Vastelaovend, die dreej daag in 't jaor,  
Dan wuurt d'r heej gefieë's, weej zien d'r weer veur klaor.  
Dae Vastelaovend det duit 't altied good,  
Die daag die zitte vol in ós gemood

Hoempapa en blaosmeziek,  
Mak ós same toch zoeë riek.  
'n Tuuenke heej en neutje dao,  
Kóm loup mich achternao.

Kóm maak joeks met mekaar,  
En doot dan ens lekker raar.  
En dan geit heej idderein,  
Wie eine boemeltrein.

## Refrein:

Hald dich lekker vas  
Aan dae Tiroler jas.  
Zing dan mei met mich  
En trek ein blie gezich.  
Klats dich op de bein,  
Net wie idderein.  
Want dae blaosmeziek,  
Dae mak 't heej zoeë sjiek.

## Couplet:

Met Vastelaovend dan make weej meziek,  
Vergaet d'n ozel maar en maak dich gaar neet diek.  
Met Vastelaovend dan gaon weej oet ós plaat,  
Weej sjouwe dan weer door wies 's-aoves laat.

Hoempapa en blaosmeziek,  
Det is heej beej ós uniek.  
Met meziek en vuuel geblaer,  
Wat doon weej det toch gaer.

Idderein ein hutje op  
Met 'n träötje boave d'r op.  
Zoeë geit det allein heej,  
En weej, die zien d'r beej.

## Nao 2de kier refrein:

Hoempa hoempapa  
Hoempa tralala  
Hoempa hopsasa  
Hoempa hoempapa

# Dit is wat 't is

*Zang: Ruud Geeraets, Wout de Wolf,  
Annette Creemers-Hermans, Lonneke van Doorn*



## Couplet:

Ik zoot mich ein tas kóffie, 't euverveel mich haos  
Boeëne met wat water, verslik mich in d'n draos  
Waas ik wat vergaete, det wis ik neet zoeë zier,  
'k had genne filter mier

## Refrein:

Dit is wat 't is  
Want de bis zoeë wies se bis  
Genne filter veur d'n bums, want weej  
Zien zoeë wie weej zien  
Laot det neppe noow maar weg  
Gen Al maar laevesech

## Couplet:

Ik keek ens in mien inbox, maar zoot geliek al klem  
Elf hónderd maitjes, ik zoog allein maar spam  
De loeëterie gewónne, det waas zoeë kier op kier  
'k had genne filter mier

## Brök:

Maar scroll ik daags d'r nao, mien socials door  
Dan greujt de spiet met idder aor

## Refrein:

Dit is wat 't is  
Want de bis zoeë wies se bis  
Genne filter veur d'n bums, want weej  
Zien zoeë wie weej zien  
Laot det neppe noow maar weg  
Gen Al maar laevesech

Zoeë wie weej zien, want  
Dit is wat 't is

# Good gemuts

*Zang: Patricia Görtjes, Sharon Meelkop-Suiker,  
Renee Wilders, Esther van den Hombergh-Janssen*



## Refrein:

Good, good ,good ,good gemuts.  
Dus zet met Vastelaovend ein kwant hudje op d'n bluts.  
'ne Hood met hiel vuuel blome, of juus 'n fuulke veur.  
Det mak ós gaar niks oet, 't krieg al gauw ein tóffe kleur  
En hebs se toch d'n hood dan gans verpruts  
dan neme weeje dich aan d'n erm,  
want weeje zien good gemuts  
Good, good, good, good gemuts,  
Weeje prooste op t laeve, jao want weeje zien good gemuts.

## Couplet:

Al maonde van te veure, make weeje ós bes waal drök  
Nie pekskes waere dan gemak, det is ós weer gelök  
Maar óch d'n hood van veurig jaor, dae pas ós neet mier good  
Dan make weeje 'ne nieje op, des good veur ós gemood.

## Couplet:

Al geit 't alzelaeve neet, wie of det 't mótt gaon  
En zits se lever gans allein as menke op de maon  
Dan hebbe weeje 't medicien dus kóm maar efkes heej  
Weeje zette dich ein hudje op, dan huurs se ouk d'r beej

# Winnaars Liedjesavond vanaf 2000

| Jaor | Titel                                    | Artiest                                                        | Teks/Meziek                                        |
|------|------------------------------------------|----------------------------------------------------------------|----------------------------------------------------|
| 2025 | Loup ós noow maar nao                    | Marina Claessen en Willy Billekens                             | Hans Steinhage, Peter Jansen en Hay Geritz         |
| 2024 | Noow d'r toch zien                       | Teun Paulussen en Steve Spengler                               | Hans Steinhage en Peter Jansen                     |
| 2023 | Vastelaovend det bis dich!               | Marina Claessen                                                | Hannelore Winter, Laurence Winter en Jack Claessen |
| 2022 | Wao zien we gister gewaes                | Willy Billekens en Bart Janssen                                | Peter Jansen en Hay Geritz                         |
| 2021 | 2021                                     | Willy Billekens en Bart Janssen                                | Peter Jansen en Hay Geritz                         |
| 2020 | Mien schoon                              | Willy Billekens en Bart Janssen                                | Peter Jansen en Hay Geritz                         |
| 2019 | Eine moeije mins                         | Paul Lenders, Graat Peeters en Onno Vaessen                    | Paul Lenders en Ruud Bettinger                     |
| 2018 | Ich heb op dich gewach                   | Marissa Verhaegh en Ron Deenen                                 | Peter Jansen en Hay Geritz                         |
| 2017 | Eine erme mins                           | Bart Ebus, Loek Heunen, Marco Gielens en Etienne Snel          | Peter Jansen en Hay Geritz                         |
| 2016 | Kwiët                                    | Bart Ebus, Loek Heunen, Marco Gielens en Etienne Snel          | Peter Jansen en Hay Geritz                         |
| 2015 | Miene vastelaovesbloës                   | Bart Ebus, Loek Heunen, Marco Gielens en Etienne Snel          | Peter Jansen en Hay Geritz                         |
| 2014 | Versiere                                 | Hans Aerts en Willy Billekens                                  | Cas Meijers, Wiet van 't Zandt en Peter Jansen     |
| 2013 | Galdere                                  | Hans Aerts, Peter Wilders, Willy Billekens en Bernie Billekens | Marc Peters                                        |
| 2012 | Wat kint 't gaeve                        | 2 kier 2                                                       | Frank van den Broek en Hay Geritz                  |
| 2011 | Blief veur altiêd beej mich              | Jozanne van der Velden en Roel Verberkt                        | Peter Brans en Henk Sneijers                       |
| 2010 | Bliërick blief boête                     | Hans Aerts, Peter Wilders en Willy Billekens                   | Marc Peters                                        |
| 2009 | Kóm dich ens heej                        | Hans Aerts, Peter Wilders, Willy Billekens en Bernie Billekens | Frank van den Broek en Hay Geritz                  |
| 2008 | Dao geit -e weer haer                    | Peter Jansen en Wim Janssen                                    | Peter Jansen en Wim Janssen                        |
| 2007 | Alles kump good                          | Bert Buskes, Graat Peeters, Onno Vaessen en Paul Lenders       | Paul Lenders en Ruud Bettinger                     |
| 2006 | Ik zoel waal wille maar ik weit neet wie | Bram Holla en Ruud Stikkelbroeck                               | Peter Jansen en Wim Janssen                        |
| 2005 | Dan bin ik blie....                      | Peter Jansen en Wim Janssen                                    | Peter Jansen en Wim Janssen                        |
| 2004 | Begaaije                                 | Mai Anróchte                                                   | Jack Claessen en Mai Anróchte                      |
| 2003 | Wie wet 't det?                          | Peter Jansen en Wim Janssen                                    | Peter Jansen en Wim Janssen                        |
| 2002 | As ik 't heb                             | 2 kier 2                                                       | Frank van den Broek en Jan Bax                     |
| 2001 | Beej mien mooder                         | Wim Janssen en Peter Jansen                                    | Peter Jansen                                       |
| 2000 | De film kwiët                            | René Hutjens, Henk Sneijers, Resy Wolters, Mendy Sneijers      | Hannelore Winter en Jan Bax                        |

# Nemes haet ein dräodje los

*Zang: Sandy van de Perre, Lony Wouters, Stan Dekkers*



## Couplet:

Wie ik dich taeg kwaam veulde ik  
ein energie  
De spanning die steeg geliek  
Of waas dit fantasie?  
As dich nao mich lachs noow vannach  
Dan zet ik mich on-hold  
Mien hert det alweer euversleit  
Met elf hónderd volt

## Refrein:

Nemes haet ein dräodje los  
Want weej zien gewoeën ós zelf  
Vastelaovend is begós  
Kump spanning beej ós vanzelf  
Want straks as 't haos weer gedaon is  
Dan laje weej ós weer op  
Nae nemes dae al gegaon is  
Want met dees dreej daag, haet nemes ein dräodje los  
(Want met dees dreej daag, haet nemes ein dräodje los)

## Couplet:

En in ein gans aafgelaje zaal  
Staon weej beejein  
Gans statisch det waas ik al  
Met vunkske in mien brein  
De lempkes die flikkere al,  
Ein schruufke los gerak  
Dien vibe op de dansvloer vannach  
Haet kortsloeting gemak

## Brök:

En kumps dich wat doeënder beej mich  
Gaef ik miene beste 'look'  
Ein lekker kōsmuulke van dich  
Kreeg ik mich eine schoek!

# Wao mó't det haer met dich

*Zang: Hay Vercoulen*



## **Couplet:**

't Höf zich van de minse, mós met de massa mei,  
Al zoels se anders winse, kriegs gennen eigen drei,  
Ik waer heej óngelaoge, zoeë maar beejeingevaeg,  
En bin zónder te vraoge met dich noow ónderwaeg:

## **Refrein:**

Wao mó't det haer met dich?  
Det vraog ik gaer aan dich,  
Wao det ouk haergeit: weej gaon neet allein,  
Wao mó't det haer met dich?  
Want ech, ik zwaer 't dich:  
Zoeë kómme weej dezen daag neet mier vanein.

## **Couplet:**

Mien broor is eine blieje, woel met d'n optoch rónð,  
Ein aezelspak veur twieë hae kop en ik de kónt.  
Had ik maar neet geluusterd, ge raojt 't al meschien:  
Ik dach dao in 't duuster: wao zoel ik noow toch zien?

## **Refrein**

## **Refrein**

Zoeë kómme weej dezen daag neet mier vanein.

# Mienen druim

Zang: Kevin Timmermans



## Couplet:

Wie weej as jónge blage, ik weit 't nog zoeë good.  
Ens keke nao dae wage, met kriebels in ós blood.  
Weej druimde euver later, euver wie 't waere kós,  
Maar noow is 't veur dich dan ech begós.

## Refrein:

En dan op Vastelaoves zóndaag, drei ik ein rundje um dich haer.  
Dienen druim is oetgekómme, dit woels se toch zoeë gaer.  
Dao baove op dae wage, ik zeen de vaere al van wied  
Dao steis se dan, met op d'n bluts  
ein Prinsemuts.

## Couplet:

Toen waas dao daen aovend, d'n daag van 't Swaree.  
't Waas sjiek en vuuel belaovend, gans Bliërick waas d'r beej.  
Dich bis noow Prins gewaore, van ós dörpke aan de maas.  
Noow kiek wat kump van druime in 't graas.

## Refrein:

En dan op Vastelaoves zondaag, drei ik ein rundje um dich haer.  
Dienen druim is oetgekómme, dit woels se toch zoeë gaer.  
Dao baove op dae wage, ik zeen de vaere al van wied  
dao steis se dan, met op d'n bluts  
ein Prinsemuts.

Noow veur dich de ganse tent, in 't greun oranje kleurt.  
Wae wet bin ik 't volgend jaor aan de beurt.

## Refrein:

En dan op Vastelaoves zondaag, drej ik ein rundje um dich haer.  
Dienen druim is oetgekómme, dit woels se toch zoeë gaer.  
Dao baove op dae wage, ik zeen de vaere al van wied  
Dao steis se dan, met op d'n bluts  
ein Prinsemuts.  
Dao steis se dan, met op d'n bluts  
ein Prinsemuts.

# Dao waer ik blie van

*Zang: Teun Paulussen, Steve Spengler*



## **Couplet:**

Nao zónne late nach, dae weer van alles brach,  
Heb ik eine holte kop.  
Maar dan kump óngevraag, 'ne wage um d'n baog,  
Met ein joekskepel d'r op.  
Dae wage schoegelt op en neer,  
Van al 't leweit en van plezeer:

## **Refrein:**

Kiek, dao waer ik blie van,  
Jao det guf mich weer d'n drei,  
Kiek, ik bin wie nie dan,  
Jao, dao wil ik gaer met mei,  
De zuus 't al van vaer,  
De dinks: weej kinne weer,  
Want as d'r zoeëwat naeve kump dan wils se d'r achterhaer.  
Kiek, wae dao neet blie van wuurt,  
Dae blief maar oet de buurt,

## **Couplet:**

't Raodhoes steit weer vol, as ik dao binne rol,  
Nemes is d'r dae ik kin,  
Inens steit naeve mich ein noeëits gezeen gezich,  
En det houwt d'r beej mich in.  
Ik kin d'r gaar neet euver oet:  
Wat haet det ein moeëj geschminkte snoet!

## **Refrein**

## **Refrein**

Dae wet neet wie 't huurt

## Uniek speciaalbeer van de Wortelepín

*Ter gelaegenheid van 7 x 11 jaor Vastelaovesgezelschap "de Wortelepín" zien 3 unieke speciaalbeere gebrouwe.*

*Allein verkriegbaar beej Sur Meuse of te bestelle door 'ne mail te steure nao jubileumbeer@wortelepín.nl. Ouk tof um as relatiegeschink of kedo te gaeve.*



Mail os  
direk!



**De Vors Carotius Tripel**, 'n sterk goldblónd tripelbeer met fruitige en kruijige aroma's

**De Blónde Truij**, 'n fruitig zwaorder blónd beer met 'n combinatie van Amerikaanse en Duitse hoppe

**D'n Dreej Döbbele Viefklap**, 'ne heerlijk doordrinkbare döbbel met zaachte tinte van karamel, viege en reziene

# Ik blijf heej

*Zang: Roy van den Broek, Dani Ruijten*



## Refrein:

Hé, ik bin d'r weer beej  
Met Vastelaovend blijf ik lever heej  
mich kriegs se noow met dees daag van zien laeve neet weg  
Vergaet 't maar,  
Ik gaon veur gen gold, nae genne euro nao moeëj San Tropee  
Veurs se 't wets is weer alles gedaon en veurbeej  
Bekiek 't maar  
Ik gaon neet weg , blijf heej  
( ik blijf heej )

## Couplet:

Ik geluif noow einmaal in d'n tied van 't jaor  
Wat ouk gebeurt det mak mich gaar niks oet vandaag  
Ik druim noow einmaal van d'n tied van 't jaor  
Al det gedeuns van noow det boeëjt mich neet dees daag  
Hes dich dae kriebel ouk, deil met idderein  
Zing met groeët en klein  
't is alles noow of noeëts , wae wet de letste kier  
Straks geit 't neet mier

Ik geluif det ik lang neet alles good heb gedaon  
Noow weit ik waal wat ik toen ech nog gaar neet wis  
Heb Vastelaovend in zien haemp laote staon  
Neet heej d'r beej zien is veur mich ein groeët gemis  
De après ski dae is , ech wal tóf op zich  
Maar misschien veur dich  
Gaef mich det feesje maar met gekleurd gezich  
Det is 't veur mich

## Brök:

Vastelaovend is veur mich , al vuuels te snel veurbeej  
Deurde 't maar hónderd daag, ging nog neet weg, bleef heej

# Hert van Bliërick

Zang: Sharon Meelkop-Suiker



## Refrein:

Wao 't hert van Bliërick leet det wet idderein  
Det zit verborge deep in dich en ouk in dit refrein  
Zoeëlang weej noow maar same zien, ós hert zal euverslaon  
Dan struimp ós de joeks door 't blood  
Kins se dan neet beej mich zien weit ik  
Det hert sleit in mich  
( letste refrein : ik weit det hert sleit in mich , ik weit mien hert sleit veur dich, mien  
hert sleit veur dich ) )

## Couplet:

Hertje van gelök, det sleit veur idderein  
't ritme van de straot en in de maot  
Det groeëte hert van gold en nemes is allein  
Veur mich persies wao ik mich op verlaot  
Ik heb zoeëlang det heej vanbinne kloep  
Allein maar Vastelaovend in de kop

## Couplet:

Lees wakker in dien bed, de wekker geit maar neet  
Gister nog waas alles toch zoeë moeëj  
Verloor aan dich mien hert maar weit nog wao 't leet  
't Zit nog op zien plek en in de ploëj  
Hald van dich met gans mien hert en zeel  
Net zoeë vuuel as wie ik veur dich veel

## Brök:

Zits in mien hert geslaote noow , beej dich laot ik ein traon  
Eine van intens gelök gewoeën umdet weej same heej dan staon

# Laot dich dreej daag neet mier los

*Zang: Joyce Verkooyen-Hanssen, José Thijssen-Linders,  
Debbie Kunz-Suiker*



## **Couplet:**

Kenón det böldert 11 kier, d'n toeën dae is gezat.  
't haet ouk lang genóg gedeurd, gedöld genóg gehad.  
't pekske aan, de snoet geschmink, ik duik d'n toemel in.  
Dao loup ik dan zoeë gans allein en dao-in heb ik gen zin.

## **Refrein:**

Wae schravelt zich dao door de nach.  
Ik preuf de bliedschap, huur dae lach.  
Det is d'r eine vol plezeer, dae zingk en dans det zeen ik gaer.  
Hae goeëjd de erm hoeëg in de lóch, hae rup dan " 'k-heb dich gezóch ".  
Ik laot dich dreej daag neet mier los, dich neet mier gaon.

## **Couplet:**

Weej sproke nao d'n optoch aaf, noow staon ik heej veur paol.  
Det fliks se genne twieëde kier, bis eine halve zaol.  
Genóg gewach, gaon op verdach, gewoeën allein op stap.  
Wae wet kump straks det witte paerd, met dae Prins zoeë riek en knap.

## **Refrein: Herhaole**

## **Brök:**

Want met Vastelaovend bleujt d'r dök verleeftheid op  
en verdreit d'r minnig jungske eine knappe maedjeskop.

## **Refrein:**

Wae schravelt zich dao door de nach.  
Ik preuf de bliedschap, huur dae lach.  
Det is d'r eine vol plezeer, dae zingk en dans det zeen ik gaer.  
Wae schravelt zich dao door de nach.  
Ik preuf de bliedschap, huur dae lach.  
Det is d'r eine vol plezeer, dae zingk en dans det zeen ik gaer.  
Hae goeëjt de erm hoeëg in de lóch, hae rup dan " 'k-heb dich gezóch ".  
Ik laot dich dreej daag neet mier los, dich neet mier gaon.

# Euverzich van ós evenemente

*Veur de kaartverkoup kint geej op ós website kieke; [www.wortelep.in.nl](http://www.wortelep.in.nl)*

**Liedjesaovend 2025** | 27 september 2025

**Inschete Vastelaovend 2025-2026** | 11 november 2025

**Swaree 2026** | 24 januari 2026

**Zónnendaag 2026** | 25 januari 2026

**Gaejerprissentasie 2026** | 28 januari 2026

**Kinderfamiliezitting 2026** | 31 januari 2026

**Hierezitting 2026** | 1 februari 2026

**Dameszitting 2026** | 1 februari 2026

**Seniorezitting 2026** | 2 februari 2026

**Groeëten optoch 2026** | 15 februari 2026

**Rouse 2026** | 16 februari 2026

**Vastelaosfinale; Mutsaafzette, Truuj verbörre 2026** | 17 februari 2026



## Nieje website al gezeen?

Vastelaovesgezelschap de Wortelepín prissenteeft gruuets eur nije website, die op vriedaag 9 mei dit jaor werd gelanceerd.

Mede door de geweldige inzet van ós eige website team en ózze gruuetse Golde Gaever We4Media is d'r iets hiel moeëjs oet d'n aek gedreid.

'ne Groeëte dankewaal aan We4Media veur 't realisere van deze moeëje mielpaol. Gank flot ens kieke en vier dit moment met ós mei!



De nije website is te bewóndere via [www.wortelepín.nl](http://www.wortelepín.nl), of scan de QR code rechts.



| Liedjesavond de Wortelepín 2025               | Vakjury | Joeksjury | Zaaijury | Totaal |
|-----------------------------------------------|---------|-----------|----------|--------|
| Liedje 1: Gewoeën negaere                     |         |           |          |        |
| Liedje 2: Hoempapa en blaosmeziek             |         |           |          |        |
| Liedje 3: Dit is wat 't is                    |         |           |          |        |
| Liedje 4: Good gemnuts                        |         |           |          |        |
| Liedje 5: Nemes haet ein dräädje los          |         |           |          |        |
| Liedje 6: Wao mó't det haer met dich          |         |           |          |        |
| Liedje 7: Mienen druim                        |         |           |          |        |
| Liedje 8: Dao waer ik blije van               |         |           |          |        |
| Liedje 9: Ik blief heej                       |         |           |          |        |
| Liedje 10: Hert van Bliërick                  |         |           |          |        |
| Liedje 11: Laot dich dreej daag neet mier los |         |           |          |        |